

44,344
WZZ
2

44,344
WZZ
2

宋詩鈔

清

吳之振
呂留良
吳自牧

選

清

管庭芬
蔣光煦
補

宋詩鈔

第二冊

中華書局

宛丘詩鈔

張耒，字文潛，號柯山，人稱宛丘先生，楚州淮陰人。少善屬文，遊學于蘇轍。轍愛之，因得從軾遊，稱其汪洋冲澹，有一唱三歎之聲。第進士，歷官至直龍圖閣，知潤州。坐蜀黨，徙宣州，謫監黃州酒稅。徽宗起爲太常，出知潁、汝。復坐黨籍落職。在潁時，聞蘇軾訃至，爲舉哀行服，遂貶房州別駕，安置于黃。後五年，得許自便，居陳。時二蘇及黃、晁諸人相繼殄歿，惟耒尚存。士人就學者衆，分日載酒肴事之，其名益甚。卒年六十一。史稱其詩效白居易，樂府效張籍；然近體工警不及白，而醞藉閒遠，別有神韻。樂府、古詩，用意古雅，亦《長慶》爲多耳。子瞻謂耒得吾工，張得吾易，謾相壓也，要在秦、晁以上。

休日同宋遐叔詣法雲遇李公擇黃魯直公擇烹賜茗出高麗盤龍墨魯直
出近作數詩皆奇絕坐中懷無咎有作呈魯直遐叔

休日不造請，出遊賢友同。城南上人者，宴坐花雨中。金猊散香霧，寶鐸韻天風。鳥語演實相，飯香悟真空。尚書二三客，淨社繼雷宗。黃子發錦囊，句有造物功。握中一寸煤，海外千年松。誰降午睡魔，賜茗屠團龍。晁子卧城西，咫尺不可逢，豈無坐中客，終覺欠此公。歸帽見新月，撲衫暮塵紅。困眠有

餘想，却聽寺樓鐘。

掛虎圖于寢壁示桔槔

畫工出幻事，縞素發原藪。蕭蕭白茅低，凜凜北風走。耽然老於菟，舉步安不驟。目光炯雙射，怒吻呀欲受。彼彪擲其旁，文彩淡初就。雖然竊形似，已足走百獸。煩君衛吾寢，振此蓬蓽陋。坐令盜肉鼠，不敢窺白晝。

神運殿望香爐天池等峰晚宿官廳明日早發

遠公不出山，坐受龍天供。地祇敢愛寶，木石親輸送。巖巖千年屋，山立屹不動。風雲宿修梁，星斗近華棟。亭亭碧香爐，蒼蘊時自涌。五雲嚴擁衛，天樂下鸞鳳。神池閱寶像，光怪發巖洞。誰能陟其顛，手攬游龍轡。東堂黃金藏，龍象儼環拱。蕭條亡國輦，拙撲昔誰用。掃堂爲一睡，清極乃無夢。思歸戒晨發，結束勤僕從。鴻鍾振林莽，月落朝嵐重。再往墮渺茫，猿鶴應嘲諷。

贈張公賁

我昔爲諸生，奉書諫議公。後來辱稱獎，禮數賓客同。決科甫弱冠，年少氣如虹。歸來陪後乘，不責醉後恭。孤舟梁宋郊，旅態萃百窮。拜公睢陽府，笑語若春風。人事不可期，俯仰異吉凶。平生丹竈術，馬齒哭新封。十年得吾弟，懷舊涕沾胸。清貧守家法，眉宇肖德容。交臂是非外，爲寮兄弟中。東軒

語長夏，葵竹羅青紅。西舍雪夜歡，玉顏醉瑤鍾。欲飲徑相就，三更叱閤翁。鯨吸絕遺滴，山頽信傾峰。搜抉盡醬茹，楂梨倒筐籠。通宵兩沉醉，午起頭如蓬。人生定當爾，事去挽驚鴻。河梁繫君馬，一笑喜相逢。憐君碧紗幌，夜淚哭韋叢。我方困蠶鹽，酸寒官辟廕。同尋舊遊地，塵壁胷絲蟲。啼鳥古寺閑，夏陰小園空。酒市逢好好，琵琶失玲瓏。歌舞一分散，賓僚亦西東。忘情猶一歎，齊物論非通。官冷隱朝市，端能信余慵。人生當富貴，子盍自磨礪。便當引五車，一一貯心胸。功就螳作垤，叢成蛇化龍。北郊分袂歸，作惡驚兒童。長謡代晤語，發子一笑哄。

離黃州

扁舟發孤城，揮手謝送者。山回地勢卷，天豁江面瀉。中流望赤壁，石脚插水下。昏昏煙霧嶺，歷歷漁樵舍。居夷實三載，鄰里通假借。別之豈無情，老淚爲一洒。篙工起鳴鼓，輕櫓健於馬。聊爲過江宿，寂寂樊山夜。

宿樊溪

黃州望樊山，秀色如可鑒。扁舟橫江來，山脚繫吾纜。大川失洶湧，淺水澄可攬。北風吹疏雨，夜枕舟屢撼。齊安不可望，滅沒孤城暗。奔流略溪口，龍脣屢窺瞰。平生千金質，戒懼敢忘暫。茲遊定何名，耿耿有餘念！

道士磯

匡廬莫九江，苗裔遍南服。橫江蔽原野，內外實一族。危磯插江生，石色擘青玉。蛟龍穴亂石，猱獬在喬木。我行季冬月，江蹟在山腹。扁舟如鏡面，清淨不可觸。躋攀既不可，千古長幽獨。緬想遂古初，巢居戒樵牧。

離樊口宿巴河遊馬祈寺

扁舟下樊溪，江南正清瀉。曉登巴河岸，極目望春野。步尋修竹寺，古木爭偃亞。云昔孫仲謀，刑牲致師禡。雄圖邈已矣，英概足悲吒。石梯造雲霧，丹白開廣廈。山僧安寂寞，畏冷不出舍。勞生渴閑境，頓使我心寫。晚江平若席，風勢欲相借。

龜陵灣阻風三日遙禱孤山而風止

積水多疾風，三日阻我舟。天寒波濤惡，岸窟騰龍虬。五更船篷鳴，冷氣入衾裯。平明諸山雪，爛熳鋪琳瑯。篙工笑相顧，自我巴船頭。永愧小孤神，霧鬢橫星眸。倉卒禱卽應，知我厭滯留。稍晴景物好，柳色含新柔。春風我故舊，迎我入東州。

自離富池凡三禱順濟龍求便風皆獲應又風日清霽舟行安穩委曲如所

欲感而成詩

旗尾指船頭，篙工告風便。張帆施雙櫓，去勢如脫箭。船傍兩高山，過目若流電。波平舟穩駛，客寢兀未變。吾聞江西龍，神力回字縣。往來萬夫禱，正直乃獲願。嗟余何所恃，誠恪無所薦。神豈哀吾窮，有賜不待獻。乃知人窮我，本不坐神譴。人間事苦異，未易以言辨。坐令千里遠，近若在几研。慚非謝宣城，援筆賦靜練。

出山

青山如君子，悅我非姿媚。相逢一開顏，便有論交意。今晨決然去，慘若執我袂。謂山無見留，此事寧久置。道邊青髮翁，下有白玉髓。斲之龍蛇窟，自足飽吾世。平生耽幽獨，乃若安朝市。一官等塵垢，安得敗成計。草堂醉老子，虎溪大開士。寄語二主人，爲留三畝地。

離陽翟

驅車發潁川，回望失嵩少。霜氣塞層空，黯淡寒日曉。原田際天平，百里見飛鳥。累累道傍丘，石獸臥衰草。不知誰氏碑？剝裂偶未倒。支離見隸字，書帶漢筆妙。遺墳不可問，文彩竟何效。永年恃金石，此計久可笑。昔遊已三歲，存沒傷懷抱。飽諳人世憂，安得身不老。

次潁川

許昌古名都，氣象良未替。客子遠道來，塵埃滿襟袂。黃昏造孤驛，買飯嚙枯蔽。庭寬蟾蜍高，霜氣徹

寒被。賴攜朱提杯，可具一飲費。無人勸我酌，孤燭伴客醉。笙簫誰家樓，語笑月中市。何人不行樂，而我獨涕淚！夜長更漏稀，風急鼓輦駛。天明卷席去，行止隨所值。

同楊二十縱氏寺宿草酌張正民秀才見訪

契闊千里別，惻愴難具言。殷勤一宵語，願子未卽眠。空堂燈火青，旅褐借僧氊。勞勞一杯酒，不解道路寒。經年相從樂，既別亦茫然。人間事盡爾，聚散亦何歎！但悲多難身，尚獲朋友歡。間關百憂中，一笑直萬錢。張子年未冠，已雄羣少年。巉巖坐我側，紫眸秀雙顴。壯志激衰懦，清談破愁煎。天明卽分散，奈此情悁悁！

初到都下供職寄黃九

千里不相見，勞勞復何辭。不應一城中，耿耿令我思。僦舍酒家樓，椎壚卷其旗。鼠壤敗晨炊，守翁噪羣兒。馬傍挾兩羸，雙踵待刻移。五日長安塵，故山夢中歸。何以洗我心，望君青松姿。懷情久不吐，古屋絃悲詩！

晚歸寄無咎

屋東雲移山，屋西日半壁。餘天一劍青，遠雨萬絲白。官事癡可了，未遭官長責。惟應晁夫子，不可別頃刻。

西山寒溪 一本云「挈家同潘郎遊寒溪、西山二寺并寄邵老」。詩中亦顏邵老書齋名也。

茲行頗閒暇，聊此一作「況在」。山水間。況一作「幸」。有所攜人，臭味同一源。山蹊並修澗，嘉木間蒲蓮。杉松開一作「鳴」。古剎，一作「寺」。始覺此溪寒。孤亭出屋背，石磴相牽攀。迎客窮道人，俯僂鬢眉斑。釋子一作「草草」。具粗糲，雖貧有餘歡。一本有「三杯徑就醉，陟嶽初牽攀」。午一作「馳」。登西山去，一作「路」。路作九曲彎。山禽慣不驚，夏木秀且繁。緬懷紫髯公，莫玉祠天壇。豪彊一作「雄豪」。有遺韻，興廢一作「消毀」。無留觀。空崑一泓泉，引余掬清甘。一作「眼明崑間泉，引手掬清甘」。至人悲熱惱，遺一作「留」。此消昏煩。一作「驅塵煩」。我茶非世間，一作「茶」。天上蒼月團。爲爾惜不得，烹啜一作「淪」。澆晨飡。深一作「出」。谷晚易陰，快一作「清」。雨時班班。一作「潺潺」。但見夾道松，龍鬚濕蒼顏。念一作「懷」。我亦顏人，深一作「屏」。居閉一作「深」。柴一作「閉」。關。不使倒珠玉，使一作「濟」。我胸中慳。之官亦漫浪，遇勝却一作「卽」。盤桓。平生據頑鈍，信命傲憂患。言歸徒旅一作「御」。疲，就蔭休征鞍。

讀中興頌碑

玉環妖血無人掃，漁陽馬厭長安草。潼關戰骨高於山，萬里君王蜀中老。金戈鐵馬從西來，郭公凜凜英雄才。舉旗爲風偃爲雨，洒灑九廟無塵埃。元功高名誰與紀，風雅不繼騷人死。水部胸中星斗文，太師筆下蛟龍字。天遣二子傳將來，高山十丈磨蒼崖。誰持此碑入我室，使我一見昏眸開。百年廢興增歎慨，當時數子今安在。君不見，荒涼涿水棄不收，時有遊人打碑賣。

出長夏門 初望龍門。

出郭心已清，青山忽相對。遊人傍流水，俯仰秀色內。誰張蒼玉屏，中斷神斧快。清伊瀉其間，銀漢曳天派。參差樓觀出，杳靄林麓邃。巖聲答遠響，水影弄空翠。同遊得君子，同榮教授。興與煙霞會。選勝雖自茲，高懷已塵外。

飯昭果寺

飄然乘興遊，肴酒笑俗具。僧居致野飯，草草亦有趣。山僧慣迎客，煮茗新泉注。巖花得春遲，晚秀見紅素。蕭蕭野市井，人物自來去。溪光送孤舟，石色照素樹。題名掃高壁，歲月記所遇。書罷迹已陳，出門猶反顧。

石樓

清溪若奔虬，八鎖束其頸。犇騰去莫脫，擺掣恣驍猛。嘈嘈戰風霆，萬鼓助其勁。聲驅石崖動，氣抱晴日冷。我來怯初登，注視久乃定。悠悠山川闊，寸目羅萬景。平生林野趣，疏放謝鞭警。會期山月出，一嘯清夜永。

上方

足躡青玉磴，躋攀不知勞。回頭瞰木杪，始覺所歷高。孤鳥去滅沒，奔溪深怒號。白日當畫梁，青雲送

微颺。坐久神慮平，微涼清骨毛。但驚塵垢容，俯仰近赤霄。古壁有遺字，昔人嗟寂寥。南風不知暑，古木常蕭蕭。

廣化遇雨

浮雲蔽高峰，臺殿延晚色。風聲轉谷豪，雨脚射山白。東樓瞰虛明，龍甲排檜栢。蕭森異人境，坐視動神魄。撞鐘寺門掩，晚霽尚殘滴。相攜下山去，塵靜馬無迹。歸來解鞍歇，新月如破壁。但恐桃花源，回舟已青壁。

贈無咎以既見君子云胡不喜爲韻八首

平生懷想人，握手良未易。接君同舍歡，此事非此世。十年淮海夢，一笑相逢地。投分白首期，願言何有既。

賢愚譬觀形，美醜不自見。醫肱待三折，劍鐵要百鍊。磨君古青銅，汰揀寄明辨。一智出千愚，食芹敢忘獻。

文風還正始，磊落有諸君。長者進後生，亦使我有聞。譬如狸與虎，偶使並稱文。終然不可及，困我力空勤。

文衰東京後，特起得韓子。支撐譁笑中，久乃化而靡。籍湜既洒掃，後生始歸市。垂君拯溺手，請效我一指。

詩壇李杜後，黃子擅奇勳。平生執羈勒，開府與參軍。舉世秉筆徒，吟哦謾云云。安知握奇律，一字有風雲。

觸有羸其角，進有跋其胡。膏車秣吾馬，白日在修途。雖乏無何杯，頗多未見書。力學致事功，良田本深鉏。

黃子少年時，風流勝春柳。中年一鉢飯，萬事寒木朽。室有僧對談，房無妾持帚。此道人人事，誰令余獨不。

南山縛虎師，肯顧世書字。揚眉哦楚喉，鼎畔倒侯喜。詩聲一蒼蠅，下到霹靂耳。庸庸老尋常，物外有奇偉。

與潘仲達二首

東風沛甘雨，百物一時好。江南桃李盡，紅紫到百草。道傍負擔子，寒食歸祭掃。念我淮上丘，三年不躬掃。

淮陽牡丹花，盛不如京洛。姚黃一枝開，衆艷氣如削。亭亭風塵裏，獨立朝百萼。誰知臨老眼，得到美葵藿。

次韻秦觀

琬琰非世珍，昔以羊皮換。嗟君復何求，衆棄乃所玩。十年少游兄，閉口受客難。二毛纔一第，俗子猶

憤惋。人間異巧拙，善琢貴顏汗。嬋娟守重閨，倚市爭倩盼。君胡寶滯貨，屢辱訪衰懦。譬猶卧仆塗，更侑觥與散。球然瑚璉質，磨琢爭璀璨。遲君三年鳴，更用驚我慢。

阿几

小兒名阿几，眉目頗疏明。日來書案傍，學我讀書聲。男兒事業多，何必學讀書。自古奇男子，往往羞爲儒。阿几笑謂爺，薄雲無密雨。看爺飢寒姿，兒豈合富貴。翁家破篋中，惟有書與史。教兒不讀書，更欲作何事？

宿虹縣驛

長隄隘舟車，上下無暫歇。煎熬古驛門，聒聒爭瑣屑。東南淮浙富，輸餽日填咽。楚風習喧卑，吳舌動嘲啞。平生耽靜意，投閑劇含噉。況茲道路勤，強食慰飢渴。年來嵩洛興，久與泉石結。終當卜吾廬，雲山對華髮。

有感二首

昨日鷓鴣作巢，今者鷓鴣兒。念知三月闌，春物行已稀。晚風颯不收，殘紅怨餘姿。回風起輕寒，擁爐火重吹。燈明夜齋靜，目澁臨書遲。病齒不飲酒，持杯勸妻兒。豈無兒女心，惆悵桃李蹊。彼昏安目，前，丈夫方有思。

古今不殊途，掩卷獨長想。炎爐與死灰，相去如反掌。彼昏誠不知，一醉富莫量。那知道傍殍，曾是厭盃盎。一金短販兒，豈暇議得喪。但憐反覆閒，觀者爲惆悵。聖賢蹈大方，不苟目前妄。寄身愛憎間，得失真一餉。

春雪

天寒城南寺，門外無馬迹。東風雪疾消，春泥深一尺。豈無老款段，畏蹶不敢策。還歸見兒女，怕冷不下席。揚雄玄未就，雙鬢飄已白。雖云客載酒，此意終岑寂。功成則有命，生事亦人力。胡爲不自勤，守此欲何獲。田桑既有裕，醪醴亦餘溢。嗟哉好事客，從古百無一！

秋感二首

秋日無遠暉，秋草無美姿。殘蛩弔白日，寒鳥悲空枝。時節一如此，余出悵安歸？強歌不成音，還坐空涕垂！感動百慮進，觸心遂紛披。棄損勿復道，日暮眠吾帷。

秋山多遠聲，日暮尤百態。百風落高樹，清澗瀉寒瀨。鳴蜩默誰憐，瘖死不償罪。蛩啼獨不已，有愬未逢解。天時激汝曹，寧自知進退。吹噓成踴躍，芻狗忌微祭。庭空月宵掛，園冷露晨沛。嗟哉心難忘，擗事還感慨。

魯直惠洮河綠石作冰壺研次韻

洮河之石利劍矛，磨刀日解十二牛。千年虜地因沙磧，一日見寶來中州。黃子文章妙天下，獨駕八馬森幢旒。平生筆墨萬金直，奇煤利翰盈篋收。誰持此研參案几，風瀾近手寒生秋。包持投我棄不惜，副以清詩帛加璧。明窗試墨吐秀潤，端溪歙州無此色。野人齋房無玩好，慚愧衣冠陳裸國。晁侯碧海爲文辭，盤礴萬頃澄清漪。新篇來如徹扎箭，勁筆更似畫沙錐。知君自足報蒼璧，愧我空賦瓊瑰詩。

王晉卿惠詩逾年不報累來見索而王許酒未送因次其韻督之

酸寒杜陵老，痛飲遺身世。雲安小縣麴米春，遙知美味無多子。猶令此老氣如虎，傲兀幾以醉爲累。爭如侯家美酒如江湖，金鑊犀杓與之俱。玉壺滿傾春水快，銅槽夜滴秋雨疏。主人文章足賓客，許致麴生來坐側。三杯脫帽我家風，渴如旱田占雨虹。冷官如瓶君未見，腹惟貯水冰生面。鳴鞭走送煩騶轡，坐對朝雲北風起。未欲煩公大作讎，老夫自斟看深淺。

福昌秋日效張文昌二首

秋野無人秋日白，禾黍登場風索索。豆田黃時霜已多，桑蟲食葉留空柯。小蝶翩翩晚花紫，野鶉啄粟驚人起。洛陽西原君莫行，秋光處處傷人情。

黃桑蕭蕭秋水清，田中日午村鷄鳴。場邊九月禾黍熟，空原雉飛飽新穀。棗籬蟲鳴村路曲，道邊古墳生野菊。人稀田闕草茫茫，落陽秋深能斷腸。

題韓幹馬圖

頭如翔鸞月頰光，背如安輿鳬臆方。心知不載田舍郎，猶帶開元天子紅袍香。韓幹寫時國無事，綠樹陰低春晝長。兩髯執轡儼在傍，如瞻馳道黃屋張。北風揚塵燕賊狂，廐中萬馬歸范陽。天子乘驪蜀山路，滿川苜蓿爲誰芳！

岡沙阻風

大江春風浪如屋，客舟迎風岡沙宿。連檣接柂古岸傍，岸頭無人春草綠。船頭日出炊烟起，買魚攜菜來就市。漁人水惡不出門，蕭條野市無鷄豚。堤邊紙錢灰若雨，洗酒賽神巫降語。南人艇子不避風，橫江五兩翩翩去。

有感三首

郁城本自貳師謀，騎士拔劍猶封侯。董生明經守正直，白首區區相侯國。參差世事足嗟歎，平聲。我笑羣兒較目前。可能董子之榮辱，乃在封侯得失間。

羣兒鞭笞學官府，翁憐兒癡傍笑侮。翁出坐曹鞭復呵，賢於羣兒能幾何？兒曹相鞭以爲戲，翁怒鞭人血流地。等爲戲劇誰後先，我笑謂翁兒更賢。

南風霏霏麥花落，豆田漠漠初垂角。山邊夜半一犁雨，田父高歌待收穫。雨多蕭蕭蠶簇寒，蠶婦低眉

憂繭單。人生多求復多怨，天工供爾良獨難。

到陳午憩小舍有任王二君子惠牡丹二槃皆絕品也是日風雨大寒明日

作此詩呈希古

初來淮陽春已晚，下里數楹聊寢飯。此邦花時人若狂，我初稅駕遊獨懶。任王二君真解事，走致兩槃紅紫爛。天姝國艷照鄰屋，持供佛像安敢慢。江湖逢春豈無花，格頑色賤皆可揀。暫觀中州燕趙態，一洗千里窮荒眼。風波歷盡還故郡，此願誰知輒先滿。那知中夕忽凜烈，卧擁牛衣眠失旦。名園泥淖安可入，坐惜殘芳風雨散。東隣夫子亦嗜酒，卧聽午鷄方起盥。晴明猶及一寓目，我老尚能揮大醖。

次韻答天啓

黃鍾無聲登瓦釜，蔡子青衫在塵土。逼人爽氣百步寒，知子胸中有風雨。三年河東走胡馬，絕口魚鰕便酪乳。歸來萬卷付一讀，不學兒曹用心苦。周瑜陸遜久寂寞，千年北客嘲吳語。莫徒彩筆雲錦張，要是寶劍蛟龍舞。天兵百萬老西北，快馬如飛不出戶。眼看六蠹出麒麟，走取單于置刀俎。

赴亳州教官次韻和中書錢舍人及亳守晁美叔見贈

久知疏慵難應接，勉強一官親訟牒。羈窮正似鳩無巢，擺去不如魚有鬣。從來書史鈍蹊徑，更歎詩騷窮事業。幾思狐白易絮纈，羞漉舊服求新袂。又憐夸毗竟何得，把玩區區一蚊睫。久知趨向合飢寒，